

*Sindiran. Gurauan. Sinis,
Kritis. Kiasan*





- 415 Duduk mendekut bersedia sangkar,
Atas bangga penuh berharap;
Terlalu takut rahsia terbongkar,
Tersepak tunggul jatuh tertiarap.
- 416 Dari Melaka ke Kampung Delik.
Hari berkabut tidaklah panas;
Orang suka berdolak-dalik,
Umpama ribut badainya ganas.
- 417 Beli roti sudah berketam,
Siap berbelah cantik bersinar;
Jika hati sudah menghitam,
Perkara salah dianggap benar.
- 418 Naik perahu ke hulu terpencil,
Mencari gadung di tepi kali;
Sudah tahu modalnya kecil,
Jangan gedung hendak dibeli.
- 419 Di Pulau Batam banyak kedidi,
Tepi laut berjalan pantas;
Bagai ketam dalam baldi,
Gayut berpaut berebut ke atas.
- 420 Masak sekawah lauk berkuah,
Menjamu semenda Datuk Kelana;
Hidup mewah dengan rasuah,
Berkat tiada dipandang hina.
- 421 Pengantin disambut tangan dipimpin,
Melangkah rapat dengan santunnya;
Berebut-rebut menjadi pemimpin,
Sudah dapat lupa janjinya.

- 422 Anak baung ditangkap satu,
 Ikan keli tidak serupa;
 Azan dilaung masuknya waktu,
 Sayang sekali ramai yang alpa.
- 423 Mula terang terbitnya fajar,
 Bermula hari memetik puspita;
 Ramai orang pandai mengajar,
 Diri sendiri menyanggah kata.
- 424 Hujan rintik di Kampung Sentua,
 Tempias merata di rumput mati;
 Orang politik berwajah dua,
 Lain dikata lain di hati.
- 425 Ambil turi di tepi lanar,
 Petik lada penuh setalam;
 Mengata diri sahaja yang benar,
 Ada tanda sakit di dalam.
- 426 Makan bubur ketupat palas,
 Ketupat palas dibuat sendiri;
 Budi ditabur mengharap balas,
 Tiadanya ikhlas di dalam diri.
- 427 Sayur kailan goreng berlada,
 Tanda-tanda dimasak kari;
 Orang berjalan membusung dada,
 Itu tanda sombongnya diri.
- 428 Bersama kakanda menyambut tamu,
 Tamu tiba dari Seberang;
 Jika anda tidak berilmu,
 Jangan cuba mengajar orang.